

戎政典第八十五卷

兵法部總論五

司馬法 仁本第一

此篇首言仁義兼言六德次言聖德之至文告之辭九伐之法皆行仁義以安天下之兵也

古者以仁爲本以義治之之謂正正不獲意則權權出於戰不出於中人是故殺人安人殺之可也攻其國愛其民攻之可也以戰止戰雖戰可也故仁見親義見說智見恃勇見方信見信內得愛焉所以守也外得威焉所以戰也戰道不違時不歷民病所以愛吾民也不加喪不因凶所以愛夫其民也冬夏不興師所以兼愛其民也故國雖大好戰必亡天下雖安忘戰必危天下旣平天子大愷春蒐秋獮諸侯春振旅秋治兵所以不忘戰也古者逐奔不過百步縱綏不過三舍是以明其禮也不窮不能而哀憐傷病是以明其仁也成列而鼓是以明其信也爭義不爭利是以明其義也又能舍服是以明其勇也知終知始是以明其智也六德以時合教以爲民紀之道也自古之政也先王之治順天之道設地之宜官民之德而正名治物立國辨職以爵分祿諸侯說懷海外來服獄弭而

兵寢聖德之至也其次賢王制禮樂法度乃作五刑興甲兵以討不義巡狩省方會諸侯考不同其有失命亂常悖德逆天之時而危有功之君遍告於諸侯彰明有罪乃告於皇天上帝日月星辰禱於后土四海神祇山川冢社乃造于先王然後冢宰徵師於諸侯曰某國爲不道征之以某年月日師至於某國會天子正刑冢宰與百官布令於軍曰入罪人之地無暴神祇無行田獵無毀土功無燔牆屋無伐林木無取六畜禾黍器械見其老幼奉歸無傷雖遇壯者不校勿敵敵若傷之醫藥歸之既誅有罪王及諸侯修正其國舉賢立明正復厥職王霸之所以治諸侯者六以土地形諸侯以政令平諸侯以禮信親諸侯以材力說諸侯以謀人維諸侯以兵革服諸侯同患同利以合諸侯比小事大以和諸侯會之以發禁者九馮弱犯寡則省之賊賢害民則伐之暴內陵外則壇之野荒民散則削之負固不服則侵之賊殺其親則正之放弑其君則殘之犯令陵政則杜之外內亂禽獸行則滅之

天子之義第二

此篇首言法天地觀先聖教民體俗次言賞善罰惡之法車旂章服之制軍容國容之別而以答

民之勞終之誠王官之武備也

天子之義必純取法天地而觀於先聖士庶之義必奉於父母而正於君長故雖有明君士不先教不可用也古之教民必立貴賤之倫經使不相陵德義不相踰材技不相掩勇力不相犯故方同而意和也古者國容不入軍軍容不入國故德義不相踰上貴不伐之士不伐之士上之器也苟不伐則無求無求則不爭國中之聽必得其情軍旅之聽必得其宜故材技不相掩從命爲士上賞犯命爲士上戮故勇力不相犯既致教其民然後謹選而使之事極修則百官給矣教極省則民興良矣習貫成則民體俗矣教化之至也古者逐奔不遠縱綏不及不遠則難誘不及則難陷以禮爲固以仁爲勝既勝之後其教可復是以君子貴之也有虞氏戒於國中欲民體其命也夏后氏誓於軍中欲民先成其慮也殷誓於軍門之外欲民先意以待事也周將交刃而誓之以致民志也夏后氏正其德也未用兵之刃故其兵不雜殷義也始用兵之刃矣周力也盡用兵之刃矣夏賞於朝貴善也殷戮於市威不善也周賞於朝戮於市勸君子懼小人也三王彰其德一也兵不雜則不利長兵以衛短兵以守太長則難犯太短則不及太輕則銳銳則易亂太重則鈍鈍則不濟戎車夏后氏曰鉤

車先正也殷曰寅車先疾也周曰元戎先良也旂夏后氏元首人之執也殷曰天之義也周黃地之道也章夏后氏以日月尙明也殷以虎尙威也周以龍尙文也師多務威則民誅少威則民不勝上使民不得其義百姓不得其敘技用不得其利牛馬不得其任有司陵之此謂多威多威則民誅上不尊德而任詐慝不尊道而任勇力不貴用命而貴犯命不貴善行而貴暴行陵之有司此謂少威少威則民不勝軍旅以舒爲主舒則力足雖交兵致刃徒不趨車不馳逐奔不踰列是以不亂軍旅之固不失行列之政不絕人馬之力遲速不過誠命古者國容不入軍軍容不入國國容入國則民德廢國容入軍則民德弱故在國言文而語溫在朝恭以遜修己以待人不召不至不問不言難進易退在軍抗而立行逐而果介者不拜兵車不式城上不趨危事不齒故禮與法表裏也文與武左右也古者賢王明民之德盡民之善故無廢德無簡民賞無所生罰無所試有虞氏不賞不罰而民可用至德也夏賞而不罰至教也殷罰而不賞至威也周以賞罰德衰也賞不踰時欲民速得爲善之利也罰不遷列欲民速覩爲不善之害也大捷不賞上下皆不伐善上苟不伐善則不驕矣下苟不伐善必亡等矣上下不伐善如此讓之至也大敗不誅上下皆以不善在己上苟以不善在己

必悔其過下苟以不善在己必達其罪上下分惡若此讓之至也古者戍兵三年不典觀民之勞也上下相報若此和之至也得意則愷歌示喜也偃伯靈臺答民之勞示休也

定爵第三

此篇統論軍旅之事凡百戰事皆爲枚舉極瑣屑而有原委

凡戰定爵位著功罪收游士申教令訊厥衆求厥技方慮極物變嫌推疑養力索巧因心之動

凡戰固衆相利治亂進止服正成恥約法省罰小罪乃殺小罪勝大罪因 順天阜財懌衆利地

右兵是謂五慮順天奉時阜財因敵懌衆勉若利地守隘險阻右兵弓矢禦受矛守戈戟助凡五兵五當長以衛短短以救長迭戰則久皆戰則強見物與侔是謂兩之主固勉若視敵而舉將心心也衆心心也馬牛車兵佚飽力也教惟豫戰惟節將軍身也卒肢也伍指拇也 凡戰權也鬪勇也

陳巧也用其所欲行其所能廢其不欲不能於敵反是 凡戰有天有財有善時日不遷龜勝微

行是謂有天衆有有因生美是謂有財人習陳利極物以豫是謂有善 人勉及任是謂樂人

大軍以固多力以煩堪物簡治見物應卒是謂行豫輕車輕徒弓矢固禦是謂大軍 密靜多內

力是謂固陳因是進退是謂多力

上暇人教是謂煩陳

然有以職是謂堪物因是堪物是

謂簡治

稱衆因地因敵令陳攻戰守進退止前後序車徒因是謂戰參

不服不信不和怠

疑厭懾枝柱詘煩肆崩緩是謂戰患

驕驕懾懾吟嘖虞懼事悔是謂毀折

大小堅柔參伍

衆寡凡兩是謂戰權

凡戰閒遠觀邇因時因財貴信惡疑作兵義作事時使人惠見敵靜見亂

暇見危難無忘其衆

居國惠以信在軍廣以武刃上果以敏居國和在軍法刃上察居國見好

在軍見方刃上見信

凡陳行惟疎戰惟密兵惟雜人教厚靜乃治威利章相守義則人勉慮多

成則人服時中服厥次治物既章目乃明慮既定心乃強進退無疑見敵無謀聽誅無誑其名無變

其旗

凡事善則長因古則行誓作章人乃強滅厲祥滅厲之道一曰義被之以信臨之以強成

基一天下之形人莫不說是謂兼用其人一曰權成其溢奪其好我自其外使其內一曰人二曰

正三曰辭四曰巧五曰火六曰水七曰兵是謂七政榮利恥死是謂四守容色積威不過改意凡此

道也

惟仁有親有仁無信反敗厥身

人人正正辭辭火火

凡戰之道既作其氣因發

其政假之以色道之以辭因懼而戒因欲而事蹈敵制地以職命之是謂戰法

凡人之行由衆

之求試以名行必善行之若行不行身以將之若行而行因使勿忘三乃成章人生之宜謂之法
凡治亂之道一曰仁二曰信三曰直四曰一五曰義六曰變七曰專 立法一曰受二曰法三曰
立四曰疾五曰御其服六曰等其色七曰百官宜無淫服 凡軍使法在己曰專與下畏法曰法
軍無小聽戰無小利日成行微曰道 凡戰正不行則事專不服則法不相信則一若怠則動之
若疑則變之若人不信上則行其不復自古之政也

嚴位第四

此篇多言步伍之事而并及制勝之策

凡戰之道位欲嚴政欲栗力欲窺氣欲閑心欲一

凡戰之道等道義立卒伍定行列正縱橫察

名實立進俯坐進跪畏則密危則坐遠者視之則不畏邇者勿視則不散位下左右下甲坐誓徐行
之位逮徒甲籌以輕重振馬譟徒甲畏亦密之跪坐坐伏則膝行而寬誓之起譟鼓而進則以鐸止
之銜枚誓糗坐膝行而推之執戮禁顧譟以先之若畏太甚則勿戮殺示以顏色告之以所生循省
其職 凡三軍人戒分日人禁不息不可以分食方其疑惑可師可服 凡戰以力久以氣勝

以固久以危勝本心固新氣勝以甲固以兵勝凡事以密固徒以坐固甲以重固兵以輕勝 人

有勝心惟敵之視人有畏心惟畏之視兩心交定兩利若一兩爲之職惟權視之 凡戰以輕行

輕則危以重行重則無功以輕行重則敗以重行輕則戰故戰相爲輕重 舍謹兵甲行慎行列

戰謹進止 凡戰敬則懾率則服上繁輕上暇重奏鼓輕舒鼓重服膚輕服美重 凡車馬堅

甲兵利輕乃重 上同無獲上專多死上生多疑上死不勝 凡人死愛死怒死威死義死利

凡戰之道教約人輕死道約人死正 凡戰若勝若否若天若人 凡戰三軍之戒無過三日

一卒之警無過分日一人之禁無過瞬息 凡大善用本其次用末執略守微本末惟權戰也

凡勝三軍一人勝 凡鼓旌旗鼓車鼓馬鼓徒鼓兵鼓首鼓足七鼓兼齊 凡戰旣固勿重重

進勿盡凡盡危 凡戰非陳之難使人可陳難非使可陳難使人可用難非知之難行之難

人方有性性州異教成俗俗州異道化俗 凡衆寡若勝若否兵不告利甲不告堅車不告固馬

不告良衆不自多未獲道 凡戰勝則與衆分善若將復戰則重賞罰若使不勝取過在己復戰

則誓已居前無復先術勝負勿反是謂正則 凡民以仁救以義戰以智決以勇鬪以信專以利

勸以功勝故心中仁行中義堪物智也堪大勇也堪久信也讓以和人自洽自予以不循爭賢以爲人說其心効其力 凡戰擊其微靜避其強靜擊其勞倦避其閑窕擊其大懼避其小懼自古之政也

用衆第五

此篇論臨戰之事始則迭示其法終則究竟其弊

凡戰之道用寡固用衆治寡利煩衆利正用衆進止用寡進退衆以合寡則遠裏而闕之若分而迭擊寡以待衆若衆疑之則自用之擅利則釋旗迎而反之敵若衆則相衆而受裏敵若寡若畏則避之開之 凡戰背風背高右高左險歷沛歷圯兼舍環龜 凡戰設而觀其作視敵而舉待則循而勿鼓待衆之作攻則屯而伺之 凡戰衆寡以觀其變進退以觀其固危而觀其懼靜而觀

其怠動而觀其疑襲而觀其治擊其疑加其卒攻其屈襲其規因其不避阻其圖奪其慮乘其懼

凡從奔勿息敵人或止於路則慮之

凡近敵都必有進路退必反慮

凡戰先則敵後則懼

息則怠不息亦敝息久亦反其懼

書親絕是謂絕顧之慮選良次兵是謂益人之強棄任節食

是謂開人之意自古之政也

汲冢周書 武稱解

大國不失其威小國不失其卑敵國不失其權詎嶮伐夷并小奪亂闕強攻弱而襲不正武之經也

伐亂伐疾伐疫武之順也賢者輔之亂者取之作者勸之怠者沮之恐者懼之欲者趣之武之用也

美男破老美女破舌淫圖破闕淫巧破時淫樂破正淫言破義武之毀也赦其衆遂其咎撫其闕助

其囊武之間也餌敵以分而照其儲以伐輔德追時之權武之尚也春違其農秋伐其穡夏取其麥

冬寒其衣服春秋欲舒冬夏欲亟武之時也長勝短輕勝重直勝曲衆勝寡強勝弱飽勝饑肅勝怒

先勝後疾勝遲武之勝也追戎無恪窮寇不格力倦氣竭乃易克武之追也既勝人舉旗以號令命

吏禁掠無取侵暴爵位不謙田宅不虧各寧其親民服如化武之撫也百姓咸服偃兵興德夷厥阻

險以毀其服四方畏服奄有天下武之定也

允文解

思靜振勝允文維記昭告周行維旌所在收武釋賄無遷厥里官校屬職因其百吏公貨少多賑賜

窮士救瘠補病賦均田布命夫復服用損憂恥孤寡無告獲厚咸咸問外戚書其所在遷同氏姓
位之宗子率用十五綏用闕安教用顯允若得父母寬以政之孰云不聽聽言靡悔遵養時晦晦明
遂語于時允武死思復生生思復所人知不棄愛守正戶上下和協靡敵不下執彼玉珪以居其宇
庶民咸耕童壯無輔無拂其取通其疆土民之望兵若待父母是故天下一旦而定有四海

大武解

武有六制政攻伐搏戰善政不攻善攻不侵善侵不伐善伐不搏善搏不戰政有四戚五和攻有四
攻五良侵有四聚三斂伐有四時三與搏有三哀四赦戰有六厲五衛六庠五虞四戚一內姓二
外婚三友朋四同里五和一有天無惡二有人無鄰三同好相固四同惡相助五遠宅不薄此九者
政之因也四攻者一攻天時二攻地宜三攻人德四攻行利五良一取仁二取智三取勇四取材五
取藝此九者政之開也四聚一酌之以仁二懷之以樂三旁聚封人四設圍以信三斂一男女比二
工次三祗人死此七者侵之酌也四時一春違其農二夏食其穀三秋取其刈四冬凍其葆三興一
政以和時二伐亂以治三伐饑以飽此七者伐之機也三哀一要二喪人三擯厥親四赦一勝

人必羸二取威信復三人樂生身四赦民所惡此七者搏之來也六屬一仁屬以行二智屬以道三武屬以勇四師屬以士五校正屬御六射師屬伍五衛一明仁懷恕二明智輔謀三明武攝勇四明材攝士五明藝攝官五虞一鼓走疑二備從來三佐軍舉旗四采虞人謀五後動撙之無競惟害有功無敗

大明武解

畏嚴大武曰惟四方畏威乃寧天作武修戎兵以助義正違順天行五官官候厥政謂有所亡城廓溝渠高厚是量既踐戎野備慎其殃敬其嚴君乃戰赦十藝必明加之以十因靡敵不荒陣若雲布侵若風行輕車翼衛在戎二方我師之窮靡人不剛十藝一大援二明從三餘子四長興五伐人大刑餘七三疑八間書九用少十興怨十因一樹仁二勝欲三賓客四通旅五親戚六無告七同事八程巧九闕能十利事藝因伐用是謂強轉應天順時時有寒暑風雨饑疾民乃不處移散不敗農乃商賈委以淫樂賂以美女主人若杖闕至城下高堙臨內日夜不解方陣並功云何能禦雖易必敬是謂明武城高難平湮之以土開之以走路俄傳器櫓因風行火障水水下惠用元元文誨其寡旁

隧外權驛城湮溪老弱單處其謀乃難既克和服使眾咸宜竟其金革是謂大夷

小明武解

凡攻之道必得地勢以順天時觀之以今稽之以古攻其逆政毀其地阻立之五教以惠其下矜寡無告實爲之主五教允中枝葉代興國爲僞巧後宮飾女荒田逐獸田獵之所游觀崇臺泉池在下淫樂無既百姓辛苦上有困令乃有極闕上困下騰戎遷其野敦行王法濟用金鼓降以列陣無悅怒闕按道攻巷無襲門戶無受貨賂攻用弓弩上下禱祀靡神不下具行衝梯振以長旗懷戚畏終左右憤勇無食六畜無聚子女羣振若電造于城下鼓行參呼以正什伍上有軒冕斧鉞在下勝國若化故曰明武

柔武解

維王元祀一月既生魄王召周公旦曰嗚呼維在文考之緒功維周禁五戎五戎不禁厥民乃淫一曰士觀幸時政置不疑二曰獄離刑蔽奸吏濟貸三曰聲樂闕二字飾女滅德四曰維勢是輔維禱是怙五曰盤游安居枝葉維落五者不距自生戎旅故必以德爲本以義爲術以信爲動以成爲心以

決爲計以節爲勝務在審時紀綱爲序和均闕里以匡辛苦見寇闕戚靡適無闕勝國若化不動金鼓善戰不鬪故曰柔武四方無拂奄有天下

大開武解

維王一祀二月王在酆密命訪於周公旦曰嗚呼余夙夜維商密不顯誰和告歲之有秋今余不獲其落若何周公曰茲在德敬在周其維天命王其敬命遠戚無干和無再失維明德無佚佚不可還維文考恪勤戰戰何敬何好何惡時不敬殆哉王拜曰允哉余聞國有四戚五和七失九因十淫非不敬不知今而言維格余非廢善以自塞維明戒是祇周公拜曰茲順天天降寤于程程降因于商商今生葛葛右有周維王其明用開和之言言孰敢不格四戚一內同外二外婚姻三官同師四哀同勞五和一有天維國二有地維義三同好維樂四同惡維哀五遠方不爭七失一立在廢二廢在祇三比在門四譖在內五私在外六私在公七公不違九因一神有不饗二德有所守三才有不官四事有不均五兩有必爭六富有別七貪有匱八好有遂九敵有勝十淫一淫政破國動不時民不保二淫好破義言不協民乃不和三淫樂破德德不純民乃失常四淫動破醜醜不足民乃不讓五

淫中破禮禮不同民乃不協六淫采破服服不度民乃不順七淫文破典典不式教民乃不類八淫權破故故不法官民乃無法九淫貸破職百官令不承十淫巧破用用不足百意不成嗚呼十淫不違危哉今商維茲其唯第茲念不承殆哉若人之有政令廢令無赦乃廢天之命訖文考之功緒忍民之苦不祥若農之服田務耕而不耨維草其宅之既秋而不穫維禽其饗之人而獲饑去誰哀之王拜曰恪乃言嗚呼夙夜戰戰何畏非道何惡非是不敬殆哉

小開武解

維王二祀一月既生魄王召周公旦曰嗚呼余夙夜忌商

闕

知道極敬聽以勤天命周公拜手稽首

曰在我文考順明三極躬是四察循用五行戒視七順順道九紀三極既明五行乃常四察既是七順乃辨明勢天道九紀咸當順德以謀罔惟不行三極一維天九星二維地九州三維人四左四察一目察維極二耳察維聲三口察維言四心察維念五行一黑位水二赤位火三蒼位木四白位金五黃位土七順一順天得時二順地得助三順民得和四順利財足五順得助明六順仁無失七順道有功九紀一辰以紀日二宿以紀旬三日以紀德四月以紀刑五春以紀生六夏以紀長七秋以

紀殺八冬以紀藏九歲以紀終時候天視可監時不失以知吉凶王拜曰允哉余聞在昔訓典中規非時罔有恪言曰正余不足

寶典解

維王三祀二月丙辰朔王在鄙召周公旦曰嗚呼敬哉朕聞曰何修非躬躬有四位九德何擇非人
人有十姦何有非謀謀有十散不圉我哉何慎非言言有三信信以生寶寶以貴物物周爲器美好
寶物無常維其所貴信無不行之以神振之以寶順之以事明衆以備改

闕

以庸庶格懷惠四位

一曰定二曰正三曰靜四曰敬敬位丕哉靜乃時非正位不廢定得安宅九德一孝子畏哉乃不亂
謀二悌悌乃知序序乃倫倫不騰上上乃不崩三慈惠茲知長幼知長幼樂養老四忠恕是謂四儀
風言大極意定不移五中正是謂權斷補損知選大恭遜是謂容德以法從權安上無厲七寬弘是
謂寬字準德以義樂獲純嘏八溫直是謂明德喜怒不鄰主人乃服九兼武是謂明刑惠而能忍尊
天大經九德廣備次世有聲十姦一窮

闕

干靜二酒行干理三辯惠干智四移潔干清五死勇干武

六展允干信七比譽干讓八阿衆干名九專愚干果十復孤干貞十散一廢

闕

行乃泄

闕

三淺